



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

Venus nem Indian Wells
atema wild-card agütsü

US-Russia diplomatic mission
yanglushitsü mulungtepogo: Putin



VOL. XXII ISSUE NO. 128 (ADOK 128)

DIMAPUR

ROGONÜ (FRIDAY)

TSÜKLAI (FEBRUARY) 21, 2025

₹ 5.00

WC, NNPG lenirtemi Dimapur nung AK Mishra ajuru

Dimapur, Tsüklai/February 20 (TYO): WC, NNPG Convener Gen.(Retd.) MB. Neokpao, Working Convener P.Tikhak Naga aser Working Convener Col.(Retd.) Isak Sumi nungeri anir Working Committee lenir ajungai February 20, 2025 nü Dimapur nung AK Mishra, Advisor NE, MHA-i anir aliba Gol representatives tem ajurua liasü.

WC lenirtemi centre nungi aruba lenirtem nem tawa atalokba indang angatetdaksü aser Indo-Naga yimten ken o tekeratiba tangatetep kati arutsü nüngdakba indang shia liasü, ta WC, NNPG

angdong ka ajanga ashi.

Senden nung Naga political groups aser stakeholders tangatetep kati arua stakeholders kata mezüdoki ken o bentettsü indanga jembia liasü.

Mangatetep adoka aliba NPGs tsüngta telungjem alitsü asoshi Naga civil society organisation balalai meranga inyakba indanga iba senden nung asadanga jembia.

Maneni iba ken o tatem kati maru tashi aremzüktepa, temulung agüja aser jangja-jangja maneni inyaka nokdaksü nüngdaker ta jembia liasü.

Ex-Minister Kejong Chang süogo



Kejong Chang

Dimapur, Tsüklai/February 20 (TYO): Taoba mapang Nagaland indang Minister inyaka alisang Kejong Chang Brehostiparnep 3:00 ako meta Dimapur nung süogo. Pa arishi küm 102 liasü aser kinungtsü, jabaso tem aser semchir aika yutsür asü.

Kejong Chang ya mezüng Interpreter (Dobashi) ka ama North East Frontier Agency kübok Tuensang Frontier Agency atema 1949 küm shim aser iba sülen Head Interpreter, Dobashi jenjangi atu.

1957 küm pa Village Guard Organization nung Honorary Captain shima liasü. Pa sorkar tenzükba mapang sempet balala

ngua liasü.

1965 küm pa Second Class Political Assistant to the Deputy Commissioner jenjangi ajungket aser sorkar mapa nungi June 1991 nung anisüngzük ngua liasü. Pa sorkar mapa nungi anisüngzük anguba sülen küm asem (1991-1993) atema Advisor to the Governor of Nagaland ama inyakdaksü.

Kejong Chang ya politics nung 1998 küm tetsüng ajemoka 54th Tuensang Sadar-II AC nungi tetokteper madoki shim. Pa 9th, 11th, 12th aser 13th Nagaland Legislative Assembly nung MLA ama inyaka liasü aser 2007 aser 2009 by-elections mapanga pa State Legislative Assembly nung anaben shima liasü.

Political career tepiyong Kejong ya Congress (I), Naga People's Front (NPF) den sendaktepa liasü aser tesülen Nationalist Democratic Progressive Party (NDPP) nung aden.

Kejong Chang-i Nagaland terenlok asoshi shilem tulu agia aru aser nisung aika asoshi ajungmesor ka ama jenjang balala nung nübur tenzük.

Tanü alimai tanitaker masü tanishir ama bilema inyaker aginer: Christopher Tilak

Mokokchung, 20th Feb (TYO): All India Congress Committee Secretary & Nagaland In-charge, Christopher Tilak-i February 20, 2025 nü Mokokchung semdanga District Congress Committee Mokokchung aser DCC kübok telen balala nung ketdangpur den telungjem senden ka yangi Hotel Metsüben, Mokokchung nung menogo. Pa sülen Hon'ble MP & Nagaland Pradesh Congress Committee President, S. Supongmeren Jamir, NPCC Working President, Khriedi Theunuo aser ano Congress lenirtem kar densema aru.

AICC Secretary & Nagaland In-charge, Christopher Tilak-i

iba senden nung jembidang 2028 election nukla yur tang nungi mera ka sülen ka ta agia mapa tenzüksüla. Tanü Nagaland nung Congress MLA kata mali saka tia junga Congress MP kabo lir, ta metetdaksü.

Pai political party ka tashi itta aotsü asoshi onük kar lemsatepdang, tanü asen lima lanur o tain tsüngta ongdang tulu lir, anungji, ibaji madokdaksü nüburi aginüba ama inyakba den lanur aser tetsürtem anitentsü merangtsüla, ta ashi. Tanü tain tanur ta kecha mali aser arishiji tongtibangba masü saka tensa den sütepa inyaker nübu nüngdaker, ta ashi.

(Maneni tapak 2 nung...)

NBCC-i Chhattisgarh CM dang tamanger kumzüka ayutsü ayongzük

Dimapur, Tsüklai/February 20 (TYO): Aadesh Soni ta sür nisung kati "RELIGIOUS PARLIAMENT" nung yimtsüng asem - Bishrampur, Ganeshpur, & Jhanakpur nung tenük yoker o tamajung jembiba ajanga tensa mejungi kumdaktsüba azüoktsü asoshi tekeraba nung inyaktsü ayongzüker, ta Nagaland Baptist Church Council (NBCC) ajanga Chhattisgarh Chief Minister Vishnu Deo Sai nem tezüluba ka agüja liasü.

Onoki item yimtsüng ya kong aliar memetet, anungji item yimtsüngtem nung shirnoksa aliar memetet. Ajisüaka item yimtsüng nung alirtem anema jembiba tejanga angashir onok temulung shiranger aser khurema jashir, ta NBCC General Secretary Rev. Dr. Zelhoo Keyho ajanga February 20, 2025 nü züluba shiti nung shia liasü.

Ano talisa tetsütem aser tanurtem koma amshitsü ta jembiba ajanga tali aoksar. Pai jembiba angar o jembisang mulungjang nung nisung mulungsentsü ali asü mali ta bilemdanger. Iba amala o ya mejembila liasü ta bilemer. Ajisüaka nisung meimchir, talisa tetsütem aser tanurtem sempaba agi pa agiadoker alinung iba ama o jembitsü tasü aiter, ta NBCC ajanga ashi.

Nisung meimchir ajak metettepa alitsüa menügdak. Ajemrepba jenjang nung alirtem asoshi nokdaksü atema parnok metettsüa menügdaker. Parnok tenüng nung jembitsü asoshi parnok metettsüa menügdak.

Parnok ya asen tetsütem aser asen chirtem lir, parnok ya asen adianutsür aser adianu tem lir. Tamangba yimsü tenüng nung külem adianu sempatsü mulungtetba ya nisung meimchiri shisadangtsü makok. Soni ya koba tamangba yimsü sülen anidaker onoki metettsü jangra mali, saka onoki amangba yimsü yagibo kati ka meimtsü aser ajak den yimjung nung alitsü sayur, ta NBCC shiti ajanga ashi.

India ya linük tulu, kong tamangba yimsü balala, sobaliba aser nütsüng nübur telok balala lir. Aser UN Charter kübok alima nung democracy tulutiba ta ajaki meteta lir aser züngshir. Aser item ajakji aliba ajanga alimai asen linük ya tashi tait ama repranger. Aser asen lenirtemia teti India-i nisung meimchir temeden akumtsüboba indangajak tenteta jembir, ta ashi.

Saka alimai repranga lia India-i ano maneni tamakok nguogo. Amokmeren mesüra tetsübo makai pei mulungba tamangba yimsü amangtsü aser sangdongtsü temeden akumtsüboa amshr ta alima dang sayutsü mapangji tangya lir, ta Chhattisgarh Chief Minister dangi züluba shiti nung ashi.

Soni yagi na aser nü kübok aliba ketdangsürtem pa den külemi inyaker ta shiogo. Nai iba indang noksa ngur alitsü südi. Pai iba ama o jembitsü temulung ulutetba shisadangtsü makok. Pai ashiba ya shidak asünungbo, tebur tajung state nung lenir ka ama na lenmang tai len lir, ta Chhattisgarh CM dang ashi.

Nüburtemi nüdak tamang akaba yong na tanü lenir akum südi ta amanger. Nai parnok kumzüka yutettsü asüba yong parnok nüdak tamang aka. Nai parnok ajakbo memetettsü akok, saka parnok ner senso lir. Alima tenük nüdak rangloka lir, kechiaser Soni-i jembiba alima sünga prokshiogo, ta NBCC shiti ajanga ashi.

Ibai mataloktsü asoshi nai mera shidak agitsü alimai imlaa lir. Anungji tenük ajak nüdak rangloker lia na tasü ita iba ama inyakyim nungi pilatsüla, tetsür aser tanurtem indang lenir akumtsü mapang tongogo, yimtsüng asem indang lenir akumtsü mapang tongogo aser nü lenisüba kübok Khristanpur, Hindu nunger, Muslim nunger, Jains, Buddhists aser dangartem kumzüka lir ta tamang katetdaksütsü mapang tongogo.

Ajakdang Tulusang Tsüngrem tenüng nung aser adianu ka ama angatetba tanüla nung meta talang agi pilar liaka Nagaland state nung aliba Nagaland Baptist Churches nung Khristanpur tenüng nung nür nebur kumzüka ayutsü ni ajungshir, ta Rev. Dr. Zelhoo-isa ashi.

March 1, 2025 kodanga parnok takum nung marudaktsünüi aliba tetsütem aser tanurtem den onok nokdaka lir aser tensa azüoktsü nüdak tashi lir. Parnok temulungjang nung azü jajaba onoki angashir, parnok tenük nungi nüktzü ayimba onoki angur, parnok ajepba onoki angashir, ta NBCC General Secretary ajangasa ashi.

Nagaland nung yimtsüng 397 mobile phone tower agi mayimjem lir



Telecom aser Online Inner Line Permit atema training ka DITC Conference Hall, Kohima nung tenzük dang tangokba noksa nung Home Commissioner Vyasan R. IAS den District Administration ser ITC nungi ketdangsürtem angur.

Dimapur, Tsüklai/February 20 (TYO): Nagaland nung yimtsüng 397 mobile phone towers agi mayimjemi lir, ta Commissioner and Secretary, Information and Technology and Communication, Mohammed Ali Shibab-i Brehostibarnü Kohima nung ashi.

Right of Way portal for telecom infrastructure and online inner line permit (ILP) system indang ananü training tenzükba sentong nung pai iba ya ashi.

Item yimtsüng nung 4G network agütsütsü asoshi Nagaland sorkari tajungtiba inyaktsü meranger, ta pai ashi.

Shihab-i training sentong nung

adener ajunga dang züngzünga adentsü aser network system balala indang tebilemstü angatettsü ayongzüka liasü.

Paisa training agirtem dang training atemba sülen pei aliba tesem nung mobile network tebilemstü aliba bentettsü shia liasü.

Nagaland Home Commissioner, Vyasan R-i training agirtem dang district level nung Information Technology and Communication indang office mali asünung mobile network agütsüba nung tapok adoka aliba ateptsü ayongzüka liasü.

Network shidak angutsü

mechi region nung service agütsür den junga osangtsüsang agiteptsü pai ayongzük.

Right of Way yagi nüngdakba temelaba ajunga atema telecom company tem asoshi single platform agütsür, aser junga mangatetra connectivity projects tem menur aser internet service mejungi akumer, ta Vyasan-i ashi.

Iba training nung district 17 nungi ketdangsürtem adener, koba Directorate of Information and Technology and Communication ajanga ayongzüka lir.

Kasa training nung Right of Way for telecom indang angazükdaktsütsü.

Aolijen nung Government Primary School Aolijen lapokogo



Area Education Officer Mokochung Wb.L.Alemtemsü Ao-i Government Primary School Aolijen lapokogsür kelen sentong nung jembidang tangokba noksa.

Mokokchung, Tsüklai / February 20 (TYO): Tanu Aolijen nung Area Education Officer Mokochung Wb.L.Alemtemsü Ao-i Government Primary School Aolijen lapokogsüo.

Iba Primary School lapokba sentong tatsüka ka agidang school lapokgsür Area Education Officer Mokochung Wb.L.Alemtemsü Ao-i Government Primary School tasen ka lapoktetsüsa Ungma

Putu menden aser School Management Committee-i meranga inyakba den külemi ali kibur ali melaba asoshi tenüngsang agüja ashi.

Tesayurtemi nentaka sayua National Education Policy- 2020 Syllabus nung aliba ama sayutsüla iba den textbook nung aliba dang masü saka textbook nung malibatema parnok takum nung benschia otettsüpurtem lesson talila sayusemsüla.Tanurtem iba school nung zünger aodang pass

sütetba kija masü saka parnok tanela jenjanga renemer yoktsüsa tesayurtemi merangtsülata Area Education Officer-isa tesayurtem ayongzüka jembi.

Anepdangshia pai tesayurtem ajak asoshi sarasademtsür, iba amaji tesayurtemia kati ka asoshi sarasademjang aser iba tesayuba mapa inyaksü maongka ngutetba asoshi Tsüngrem tenüng sanga school tenzükannga Alemtemsü Ao-isa tesayurtem ajungshia jembi .

Rev.Talijungla Asso.Pastor Ungma ajanga sarasademter sentong tenzüka den ali kibur tenüng nung Wb.Taliangshi Lkr Tatar-i jembi aser School Management Committee tenüng nung Wb.L.Imli Imsong Tatar-i jembi aser Council Chairman, Ungma Wb.R.Nüngshilepden Jamir Tatar ajanga tepela o jembi aser tatem nung Asso,Pastor Ungma Rev.M.Toshi jamir-I Tsüngrem tenüngsang agüja sarasadema sentong tembang aser Wb.I.Tiajungba School Management Committee Sectetary ketdangsüba nung iba sentong agi.

Nagaland Health Protection Society-i metetdaksür

Dimapur, Tsüklai/February 20 (TYO): Nagaland Health Protection Society (NHPS) ya Ayushman Bharat Pradhan Mantri Jan Arogya Yojna (AB PM-JAY) benoka inyakba agency lir aser iba kübok küm ka nung kibong shia nem insurance cover sen lakh 5 aser Chief Minister Health Insurance Scheme for Employees and Pensioners (CMHIS) kübok Employees aser Pensioners tem nem küm nung sen lakh 20 insurance cover agütsür aser AB PM-JAY kübok malirtem mesüra Government Employee mesüra Pensioner masüba kibongtem nem küm nung sen lakh 5 insurance cover agütsür.

CMHIS, ya employees aser pensioners tem indang ita shi medical allowance shilem 50 convert süa finance asür aser corpus ya Finance Department-i Savings Bank Account ka nung rizünga ayur. Sorkar tenzükertertem atema kibong shia Insurance cover sen lakh 20 aliba dak alia intokra pei department Salary head ajanga reimburse asür.

AB PM-JAY ya Central aser State sorkar nati 90:10 ratio nung finance asür. Ajisüaka premium atema Centre indang share kibong shia atema sen 1052 nung 90% lir aser iba dak talila intokra state shilem 10% den state sorkarisa agütsütsü. Ibayongji Policy Year 2024 - 25 atema state sorkar shilem shilem 51 aser Centre sorkar

shilem 49 asütsü.

Scheme tem ya insurance mode nung benoker aser national competitive tender ka ajanga insurance company shimmer. Selection mapang National Health Authority (NHA) indang guideline sülen anidaka Lowest Cost (L1) inyakyim benoka inyaksangshir. Insurance company koba shimdir parnoki claims processing, claim agizüksüba aser empanelled mozükitem nem claim agütsütsüba khuret ajak abentsü.

Tang benoka aliba policy period (April 2024 - March 2025) atema implementing insurance company ji Future Generali India Insurance Co. Ltd (FGI) lir.

Sen lakh 5 (AB PM-JAY and CMHIS General Category) insurance cover atema kibong shia atema insurance company nem agütsütsü aliba premium payable ji sen 1950 aser CMHIS (EP) atema premium ji kibongshia atema sen 3860, koba insurance cover sen lah 20 atema lir.

Instalment asem nung premium ya agütsütsü aser sorkari fund agütsüba sülen insurance company tem nem premium agütsür, kechiyong IRDAI regulations dak ajemdaker premium magütsüi insurance coverage magütsütettsü.

Total premium sen crore 92 nungi sen crore 90 insurance company nem agüjatokogo.

Anungji insurance company nem premium agütsüba nung default kecha mali.

February 16, 2025 nü tashi nung Insurance Company-i item claim tem ya achaayangogo.

PMJAY atema:

- Sen crore 57.34 alang claims 30,379 agizükogo.

- Item rongnungi sen crore 42.71 alang claims 22,914 mozüki balala nem agütsüo.

CMHIS atema:

- Sen crore 72.32 alang claims 17,501 agizükogo.

- Item rongnungi sen crore 47.20 alang claims 11,638 mozüki balala nem agütsüo.

Public Health Insurance Schemes ya, mongujemi aliba medical tsütsü tintokba balala aser mozüki nung temang anepaluba mapang pei juli nungi sen intokba nokdangtsü aser nüburtem nem jenjang aketba healthcare agütsütsü asoshi risk-pooling resources indang core principle dak ajemdaker inyaker.

Rongsen ajema aliba temulungdang yur beneficiaries, empanelled hospitals, insurance companies amala stakeholder ajaki scheme ajanga agütsüba tajangzükttem kanga züngkanga amshitsü nüngdaker.

Iba dak sendakba nung osang tejangjaba agitsü atema nüburtem dang Helpline (Toll-Free No: 1800-202-3380) dangi call asütsü mesüra support-nhps@cmhis.nagaland.gov.in ajanga email asütsü metetdaksüo.

Nagaland CEO-i office melenshiba metetdaksü

Dimapur, Tsüklai/February 20 (TYO): Chief Electoral Officer Nagaland office sangdong ka ajanga Chief Electoral Officer, Nagaland indang office tesem melenshiba metetdaksüo. Anungji teküboklen agüja aliba address

ajanga tongteprateptsü metetdaksüo
Office of the Chief Electoral Officer,
Election Secretariat, Above
Office of the Accountant
General, A.G. Colony,
Kohima, Nagaland -797001.

NPF, NDPP aser Ex-PAN-i asükhu lemsatep

Dimapur, Tsüklai/February 20 (TYO): February 20 anepdang Tuensang Sadar-II nungi taoba MLA aser Minister Kejong Chang asüba osang angashia mang ayimba NPF Central HQ Press Bureau-i sangdong ka ajanga metetdaksüo.

Kejong Chang ya Nagaland nung aliba nüburtem aser talisa Tuensang district nung aliba nüburtem atema lenir tajung ka liasü, shibai pa taküm bendanga agüja nüburtem tenzüko.

Mangyim jashi tia nung aliba mapang Naga People's Front (NPF)-i asür kinungertem aser medemertem den asükhu lemsateper aser asür tanüla teti tatem makadak anisüngzükdakjang ta sarasademtsür, ta kasa sangdong ajanga metetdaksü.

Nationalist Democratic Progressive Party (NDPP)-ia, taoba minister Kejong Chang asüba osang angashia mang ayimba lemsatepogo, shibai sorkar küm aika tenzüko.

Pa yimden yimsütsüba nung 1998 küm aden aser 54thTuensang Sadar - II assembly constituency nungi tetokteper makai shima liasü. Pa 9, 11, 12 aser 13buba Nagaland Legislative Assembly nung MLA liasü aser yimden yimsüsür ka aser sorkar tenzüker ka ama inyakba

mapang pai ochishia aser bendanga agüja pa mapa inyakba ajaki jangja meteta lir. Pa 2022 küm NDPP nung aden aser 54thTuensang Sadar - II NDPP assembly constituency senyur liasü.

NDPP-i, Rev. Dr. Chingmak aser asür kinungertem den asükhu lemsateper aser tulusang Tsüngremi asür tanüla teti tatem makadak anisüngzükdakjang ta sarasademtsür, ta NDPP tir Chingwang Konyak-i kasa sangdong ajanga lemsatep.

Maneni Ex-Parliamentarians Association of Nagaland (Ex-PAN)-ia, February 20 anepdang Dimapur nung Kejong Chang asüba osang angashia temulung koremba lemsatepogo.

Pa tambur akümbe ajanga kanga yakyaka minyakaka pa ya Ex-PAN züngsemtem tajungshir ka liasü aser pa asüba ya Ex-PAN kibong asoshi takoksa tulu lir.

Ex-PAN-i, asür kinungertem den asükhu lemsateper aser mangyim jashi mapang nung aliba mapang parnok nem anisüngzüc agüjang ta aser asür tanüla yimjung nung anisüngzükdakjang ta sarasademtsür, ta tir Joshua Sumi aser General Secretary Tarie Zeliang nati külem sangdong ka ajanga metetdaksü.

Tanü alimai tanitaker masü... (TAPAK 1 NUNGI...)

Shisatsü jenti bena liaka itemji inyaksü asoshi lenir melira mapa manungtsü. Asüng alimaji tanü nai koda inyaker ta asüba dak keta lir. Yisu ya lenir tajung ka liasü ta angateter, Pai ajaki angatettsüsa oshi tongmelang jembi aser tatishitsü tapet bener arua lemsatep. "Tanü alimai tanitaker masü tanishir ama bilema aser amanga inyaker lenir akanger", ta ashi. "Tanitaker amai dang lira tejakleni maotsü, anungji, khuret metettetba lenir nungdaker", ta paisa shisem.

Party ka tejakleni aotsü asoshi telok tentetji kanga tongtibang, telok tenteta assembly constituency nung temulung agütsütsüla. Yangji aliba nüburtemji metettsüla, kibok asemtsüla aser politics nung nisung metetbaji kanga tongtibang lir, ta paisa party pur dang inyakdaksünüba kar lemsatep.

Akhi Congress party koda wangshia liasü, yamato tanaben asen limai shilua bener arutsü asoshi meranga inyakba den tensa den apet nübur taginüba meteta ola adoktsü asoshi MP & NPCC tir, S. Supongmeren

Jamiri ayongzüc. Social media nung party pur tsüngta kadi ka anemtepa o tamajung langzütepa mekazüi tajangzüc akaba o jembiteptsü, ayongzüc.

NPCC Working President, Khriedi Theunuo-i jembidang, RSS nükjidong ajaki meteta lir aser BJP yimsütsüba nung aseni amangba yimsü dak aiben kongshir, iba anema noktaksü asoshi Mokochung district ya tamangba yimsü mezüng agizükdak lir, anungji, nenoki anir Khristan yimsü kümzüka ayutsü yangi nungi tenzüksüla, ta ashi. Mokochung district ya Congress tamendakdak lir aser yangi nungi lenir jenti adokogo, ano maneni yangi nungi iba party asentenshitsü paisa ayongzüc.

Iba senden nung taoba Nationalist Democratic Progressive Party (NDPP) youth leader par asem Congress party nung arua adenba asoshi pela shishia agizük. Iba senden nung DCC General Secretary (Admin), P. Aley menden liasü aser DCC vice President, I. Temsu Jamir-i tarur pela-a agizükba den party nung dener arudang ajangshiba kar lemsatep.

Rekha-i Delhi CM tenangzükba agiogo



February 20, 2025 nü New Delhi nung Ato kilonser Narendra Modi aser Delhi Lt Governor, V K Saxena nati Delhi Chief Minister Rekha Gupta (ajichilen nungi tanabuba) aser minister tasenpurtem den tangokba noksa nung angur.

New Delhi, Tsüklai/February 20 (Agencies): Brihostibarnü Ramlila Maidan nung Rekha Gupta-i Delhi Chief Minister tenangzükba agiogo; iba sentong nung BJP nung tongti lenirtem aser party pusemertem aika aden.

Rekha Gupta dak alia BJP MLA troki minister tenangzükba agi.

New Delhi menden nung AAP tongti lenir Arvind Kejriwal madak takok angusang Parvesh Verma den Ashish Sood, Pankaj Singh, Manjinder Singh Sirsa, Kapil Mishra aser Ravinder Indraj nungeri minister tenangzükba agi.

Manjinder Singh Sirsa ya Rajouri Garden Assembly constituency nungi tang agi tasembenbuba MLA lir aser pa ya Delhi nung Sikh nung rongnung tongti lenir ka lir.

BJP-isa Purvanchali nung lenir ana- Kapil Mishra aser Pankaj Singh na Cabinet nung aniok. Parvesh Verma ya BJP nungi Jat lenir ka lir aser Ashish Sood yabo tang mezüng MLA lir.

Delhi nung reserved assembly constituencies nung party jenjang tajungba akümtsü atema party-i Ravindra Indraj-a cabinet nung shimok.

Rekha Gupta-i Home, Finance, Services, Vigilance aser Planning portfolio abentsü, Parvesh Verma nem Education, PWD & Transport lemmüksü, Kapil Mishra nem Water,

Tourism & Culture lemmüksü aser Manjinder Singh Sirsa nem Health, Urban Development & Industries portfolio lemmüksü.

Ravindra Kumar Indraj nem Social Welfare, SC/ST Affairs & Labour lemmüksü, Ashish Sood nem Revenue, Environment, Food & Civil Supplies lemmüksü aser Pankaj Kumar Singh nem Law, Legislative Affairs & Housing portfolio lemmüksüogo.

Bodhbarnü BJP legislature party senden nung arrshi küm 50, Rekha Gupta House lenir shima liasü. Iba sülen nikongdang Gupta-i Delhi Lieutenant Governor V K Saxena ajurua sorkar tasen akümtsü atema asüngdanga liasü.

Gupta ya Delhi nung Chief Minister 9buba asütsü.

Rekha Gupta ya tang mezüng MLA lir aser la ya Rashtriya Swayamsewak Sangh (RSS) den tesendaktep kanga junga aliba lenir ka.

La ya taoba mapang Delhi University Students' Union (DUSU) nung Tir liasü. Delhi nung tetsür chief minister tem rongnung la ya pezübuba asütsü. Tamalen Delhi nung tetsür Chief minister temji Sushma Swaraj (BJP), Sheila Dikshit (Congress) aser Atishi (AAP) nung Delhi Chief Minister inyaka liasü.

Ano Delhi nung BJP nungi chief minister pezübubajia la asütsü. Tamalen BJP nungi

Madan Lal Khurana, Sahib Singh Verma aser Sushma Swaraj chief minister inyaka liasü.

Tang India nung BJP-i yimsüsüba state tem nung tetsür chief minister ji la dang asütsü.

Delhi assembly election nung lai Shalimar Bagh menden nung AAP candidate Bandana Kumari madak takok ngua liasü.

Gupta leniba nung Council of Ministers mezüngbuba senden nikongdang 3:00 ako nung Delhi Secretariat nung menogo.

Arvind Kejriwal-i aniba AAP-i tesüiba küm 10 tashi Delhi yimsüsüa aruba sülen tawa election nung BJP-i menden 48 nung takok ngua AAP sorkar astüngdok.

Ano külen tanga osang ka nung, Delhi Chief Minister Rekha Gupta-i, BJP-i nangzükba ama March 8 tashi nungbo sorkari tetsür nem ita shia agütsütsü nangzükba sen 2,500 agütsütsü, ta sangdongogo.

Gupta-i, mezüngbuba instalment ji International Women's Day anogomong nung temsüa aliba tetsürtem account nung inoktsütsü, ta metetdaksü.

Laisa, Ato kilonser Modi mangdang ataloktsütsüji Delhi nung BJP MLA 48 atema tongtibangtiba mapa asütsü, ta metetdaksü. Brihostibarnep Gupta-i Kashmiri Gate nung aliba Shri Marghat Wale Hanuman Baba tekülem ki semdanga sarasadema liasü.

Lendong agi kongshiba state 5 nem sen cr. 1,555 agütsütsü

New Delhi, February 20 (Agencies): Yaküm India nung tüzümsüng, anentsüh aser yipru lendong agi kongshiba state pongu nem senotsü teyari agütsütsü atema high-level committee kati agizükogo, ta ketdangsertem osang ka ajanga metetdaksü.

Union Home Minister, Amit Shah-i aniba disaster risk reduction committee-i state pongu nemji sen crore 1,555 teyari agütsütsü agizük.

Andhra Pradesh state nem sen crore 608 agütsütsü. Central nungi teyariji National Disaster Response Fund (NDRF) nungi agütsütsü.

Nagaland nem sen crore 171 lemmüksütsür, Odisha nem sen crore 255, Telangana nem sen

crore 232 aser Tripura nem sen crore 289 lemmüksütsür.

2024-25 kümsük nung Centre-i SDRF nungi state 27 nem sen crore 18,323 lemmükja liasü aser NDRF nungi state 18 nem sen crore 4,808 lemmükja liasü.

Iba dak alia Centre sorkari State Disaster Mitigation Fund (SDMF) nungi state 14 nem sen crore 2,209 aser National Disaster Mitigation Fund (NDMF) nungi state 8 nem sen crore 720 lemmükja liasü.

Yaküm tzu-mopung dak sendakba lendong balala atalokba sülen Centre sorkari tensa asadangtsü atema lendong atalokba tesemtem jagi inter-ministerial teams yoka liasü, ta union home ministry-i metetdaksü.



New Delhi, February 20, 2025: Brihostibarnü Rashtrapati Bhavan nung Chief Election Commissioner tasenba, Gyanesh Kumar-i linük Tir, Droupadi Murmu ajurudang tangokba noksa nung angur.

Sorkari Chief Economic Adviser kümsük küm ana atsülangtsüogo

New Delhi, February 20 (Agencies): Brihostibarnü Centre sorkari Chief Economic Adviser (CEA), V Anantha Nageswaran kümsük ano küm ana atsülangtsüogo; pa 2027 küm March ita nung ang iba menden nungi anisüngzüktsü.

Ato kilonser Narendra Modi leniba nung Appointments Committee of Cabinet-i contract basis nung March 31, 2027 anogo tashi Nageswaran kümsük atsülangtsütsü agizükogo.

2022 küm January 28 nü Nageswaran-i CEA mapa agizüka liasü.

CEA office ajanga rongsenkettzüng dak sendakba mapatong balala atema sorkar nem shisa agütsür aser economic survey renemer. Economic survey ya Union Budget benoktsü jakdang anogo ka jelia Parliament nung benoker.

Nageswaran ya shisashir ka aser taoba mapang Credit Suisse Group AG aser Julius Baer Group nung executive liasü. Pai K V Subramanian melenzüka liasü.

Economic Survey 2024-25 ajanga, 2025-26 kümsük nung India nung rongsenkettzüng

shilem 6.3 nungi 6.8 aintsü, ta sangdongba sülen hopta ishika tsüngda Nageswaran kümsük ano küm ana atsülangtsüogo.

Nageswaran ya kaket ken o zülur ka, tesayur ka aser consultant ka liasü. 2019 nungi 2021 küm tashi pa ya Economic Advisory Council to Prime Minister nung part-time züngsem ka liasü.

India aser Singapore na nung pai business schools aser institutes of management aika nung tesayur inyakogo aser pai züluba ocet aika adokogo.

Nageswaran-i Ahmedabad nung aliba Indian Institute of Management nungi Post-Graduate Diploma in Management (MBA) degree angu aser 1994 küm University of Massachusetts nungi Finance nung doctoral degree ngua liasü.

Pa ya IFMR Graduate School of Business nung Dean-a inyak aser Krea University nung Visiting Professor liasü.

Nageswaran-i yarisema Takshashila Institution tenteta liasü aser 2001 küm Aavishkaar Group indang impact investment fund tenzüka nunga pai yaritepa liasü.



February 20, 2025 nü Gandhinagar nung Gujarat Finance Minister, Kanu Desai-i state budget benoktsü atema state Legislative Assembly-i arudang tangokba noksa nung angur.



TIR YIMYIM YIMOBILEM (EDITORIAL)

DIMAPUR ROGONÜ, FEBRUARY (TSÜKLAI) 21, 2025

Ojalai jembiba oshi

Tanü ya alima ajunga nung Tetsü Oshi Anogomung 2000 küm Tsüklai (February) 21 nü amongtsü tenzüker küm 25 buba mung amonger. Iba Alima Tetsü Oshi anogo amungba Jubilee mung omen ya “Oshitem ya tongtibang (Languages matter)” ta agüja lir. Aji oda, 1952 küm tang aliba Bangladesh ya Pakistan kübok East Pakistan ta ser aliba mapang West Pakistan purtemi Pakistan lima ajunga asoshi yimten nung amshitsüba oshiji Urdu sünür aser East Pakistan nung alirtemi Bengali oshi aginür ta atsütepba mapang ka 1952 küm Tsüklai 21 nü Dhaka Univeristy nung kaketshirtemi Pakistan oshiji Urdu masü Bengali agitsüla ta longkak aita nokdakba sentong nung police-temi injang yok aser iba lendong nung nisung asüba anema ano tananüa Tsüklai 22 nü nübortem telong tener asür nem akhüm agütsütsü adenshiba mapanga polictemi injang yoka nisung khaset. Iba lendong nung pei tetsü oshi wazüka amshitsü asoshi taküm bendanga agütsür par pungo tenüng nung Dhaka yimti nung nungo ka yanglua lir aser iba tesem dangji pei tetsü taso lima asoshi taküm agütsür nungo “Shaheed Minar” ta ajar. Aji oda, Bangladesh nungbo 1952 Tsüklai 21 nü atalokba lendong aser takok otsü ya kaketreju nung azünger. Iba ama pei tetsü oshi meimba, apayuba aser wazüka ayutsü jangraba ngua United Nations Educational, Scientific & Cultural Organisation (UNESCO)-i 1999 küm, küm shia Tsüklai 21 ya alima ajunga nung Tetsü Oshi Anogomung asütsü asoshi sangdong aser 2000 küm nungi küm shia iba anogomung munga arur. Atangji, nisung taküm ya tetsü temang nungi tenzüker aser tetsü mama yonga tetsü meli nungi adokba ola aser oshi agi taküm nungdak mapatem inyak tenzüker. Aji oda, alima nung nisung taküm ka asoshi pei bang nungi mezüng adokba ola aser mezüng jembiba oshiji otsulai ojala den aser ojalai asenok den jembiba oshi ya lir aser iba kasa oshiji jembia asenok lokti nung aiener, anungji asen chinurtem nem agütsütsüba aser amangdaksütsüba asen senmang tongtibangtibajibo asen tetsü oshi ya lir. Atangji, oshi ya otsüla aser ojalai puratetba oshi ka masü, oshi yabo Tsüngremi agütsüba o lir, anungji o ya Tsüngrem ta asenoki angatetdi. Aji oda, o ya taküm asünungji o dak ain aser tashi tuluka lir. Ibayongji, o agi aneptsür aser o agi yirutsür, ibaji tejembir dak aket. Iba ama tashi ain aliba o ka mejembi toktsür bendanger oshi jembitsüba, kidang pei nok tajung yutsür tangar nok meshia amshir amai asütsü. Atangji, nisung ka asoshi alima nung jembiba oshi kwika angazüka jembitetdir tajungba dang saka tangar oshibo kanga junga jembitet saka pei oshibo mejembitet ta süra pei ki toktsür oa tangar ki bara nung alir amai asütsü. Aji oda, pei tetsü oshi sentoka toktsür bendanger oshi jembiba agi nisung ka pei tetsü temeim aser pei tetsü taso lima aser sobaliba nungi piladaksür. Iba jagi oda –odabo pei lima aser pei kimong lumong dena tangar meyong kumadoktsü. Aji oda, asenok lia aruba lipok aser asenok sobaliba otsütem indang aser asen oshi nung ojang shia tetezütem English nungeri meshitettsü aser English agi mesüra Nagamese agi asen tsüraburtemia asenok dang meshitettsü. Aji oda, Israel nungertemi Babylon lima parnok Zion ken metentet ama, asenoka asen tetsü oshi amadokra, kechi koda asenoki asen sobaliba, aluyimba, meimtepa aser akangjungshitepa ken atentsü? Iba jagi alima nung tang oshi meyirijang ti dak nungi tali asüba nungi tejembidak oshi meyirijang tenet shi lir aser item oshi ajakji kasasa tongtibanga ta tanü alima tetsü oshi anoogmung amungba anogo nung UNESCO-i ayongzüker. Kasaji asenok asoshi Jungli, Mongsen, Changki aser Nokpu oshi ajakji kasasa tongtibang, itemji samadaksüra shibai menoktsü? Aji oda, asen oshi samabaji asen ojala den asen taküm samar amai asütsü. Atangji, tangar oshi jembia taküm litettsü saka iba takümji shitakba taküm masü saka tangar jilu ajizüka benshiba takümang ka kumadoktsü. Aji angateta, asenokbo shitakba Aotsür aser Aor asütsüla aser aji aseni jembiba oshi agi dang jangjatsü.

OLEMSABANG

AROGOTEM NUNG TSÜNGREM O TESAYUBA TSÜTSÜ
(CHRISTIAN EDUCATION) BILEMDANGSHITSÜ ONUK KAR

~ I.Asongla Pongen, Alempang Ward, Mokokchung.

Tanü asen tendak Arogotem tia ya kanga aroka shisadanga temeimtsü tia nung aliba leman aisu nung angur. Mapa bo aika bendenloka, puratetta aser renloka inyaka aotsü merangteper, senotsü leman balala nungi bushiteta bendena mapa aika inyaksangshia, hapta ka nungi ka ta Arogotem ajaki mazüangi inyakteper. Talisa asen lima Arogotemji yamaji mapa tasen aika bushiteta/bushiloka, koda ser amangba pur anir arutsü aser nutsüng teyimba renloka aotsü ta merangteper. Yamaji mapa ajak nung temulung agüja inyakteper sernung nutsüngbo inyakba yari merenloker, meyiper tajemba ang akümer, sentep kidangi arua tekülem nung adener aser Tsüngrem nem tenungsang agütsüa Pa kelemtsü mejangrar. Ano inyakyim aika bendena inyakba nung nutsüngtemi aiben temulung agüja madener aser tajongshitepa ajema akümer. Pei adenba Arogo yutsür tasen tenzüka aoba nungang sapua adener. Ano kelen reprangdanga, Tsüngremer rongsen amshiyim nunga temulung masüba ang tali adokadoker. Joko tamanger temi tepela aser temoatsü tenla dang masü saka tershilem koba asen Tsüngrem shilem lir ibajia magütsüner. Ali rongsen kodangajema kümdir aser sensaka lidir Tsüngremer Arogo mapa temjia inyaka motettsü aser nutsünga merenloktsü. Ano kanga tongtipang teinyaktsü kaji, Arogo achaayangtsü aser kedangsutsü nepo bushidanga nisunger bilemba aser melongba dang kodang inyakdir iba ajanga telemsa, mepetmesu aser teraksa dang adoklanglang. Item ajak ya kechi ajanga ataloker? Bilemdangtsü nungdak.

Temalen shisema aliba ama, kodang Khrista dak amendaker tenzüka Arogo ka inyakyim nung item mapa tem aser tatalokba lidir Arogo kaji tejakleni maotsü aser nutsüng ajema akümstsü ana nung lir, item noksatemi sadakjema angur. Kechiyong, neburtemi item inyakyim aser medokmeperi aika reprangteta liaka Arogopur rongnung tasü ita, iba yabo Laishiba tesayuba ama masü, tai mapa, melenshitsüla, ta meshiteter, aibelenbo ngua meteta lir saka metongshitsür melei kümdagi. Arogo kadi inyaktsü tulutibaji Laishiba tesayuba nung tamakok lir (Christian Education) Kechiyong khrista dak amanger shiaji, Lai tesayuba dak ajemdaker koma inyaka aser liyonga aotsü, iba tesayuba peria agütsütsü nungdak. Aji suaka, aiben nisunger tekolok agi puratetba sarasangchi mapa tem koba ajanga nisunger peladaksür aser tenungsang angur, iba tsütsü atsünga dang tuluba jangratepa inyakteper. Anungji, Arogotem ajaki Laishiba tesayuba dak ajemdaker netsüngsuba nung temulung agütsütsüji kanga nungdak. Laishiba, Tsüngrem Oji anatsü nok amai lir, kechiyong Khristan taküm ka asoshi shisatsü ajakperia angudakji Laishibaji lir, iba tesayubaji sendoka medoktsütsüla. Tanabuba Timothy 3:17, yamai ashir, "Tsüngremi apuoktsüba Lai shia ano tesayutsü, tarutsütsü, metongshitsütsü, temeshiba nung aliba sayutsü asoshi tajung lir." Yisu Khrista dak amanger shia nem Laishibaji kechi aser iba tesayuba ama alitsü sayutsü Arogo ka teinyaktsü.

Arogotemi bilemdangtsü aser koba nung tamakok ali aser kongsa mashi angateta ali, ken meyipa reprangshia hau ta agizüktetra, Tsüngrem O tesayuba tsütsü (Christian Education) ken temulung agütsütsü asoshi aika rongnung tongtipang onuk kar lemsateper:

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Impur nung ABAM Social Concern-i Assessment Camp ka ayonga



Impur, Tsüklai/February 20 (TYO): February 18-19 anogotem nung Impur nung ABAM Social Concern ajanga ayonga PMDK Dimapur (ALIMCO) aser Mokochung District Disability Forum (MDDF) den longjemer temang nung mokokminba asadangba (Assessment) camp ka kanga takok tulu nung agiogo, ta ABAM Executive Secretary, Rev. Dr Mar Pongener-i sangdong ka ajanga metetdaksü.

Iba camp ya Assistance to the Person with Disability (ADIP) schemes aser Rashtriya Vayoshree Yojana (RVY) ajanga agia liasü.

Tanü küm agi menepa temang nung timtem balala ajuruba tain rogotem teyari osettsüset nungdakbapur aika aliba den külemi temang nung mokokmin balala bener teyari

osettsüset nungdakbapur jenti lir. Item nungdakba nung yaritetsüsa ADIP aser RVY scheme ajanga maongka ngua iba camp ayonga agi.

Nungdakbapur shirsa temsüa ngugo, parnok asoshi tricycles, wheelchairs, crutches, walking sticks aser hearing aids angati agütsüsa. Ajak agi Arogo 39 nungi nungdakbapur 350 arua iba camp nung denogo.

Rev. Dr. Mar Pongener Executive Secretary ABAM, ajanga okilaba mapang nung, Arogoi shinga danga bendangshidanga meinyaker saka ajak kasa meima nisung shia nungdakba yari awajemtsü meranga inyaker, ta ashi.

Paisa, Tsüngremer tayimjem yimya dak rangloker Arogotem ajaki maneni züngsem shia nungdakba ajiteta ano tayimjemba nung inyaksü ayongzük.

Tanü agiba sentong ya iba tayimjem wadang inyakba rongnung ka, ta paisa shisem.

ABAM ajanga ALIMCO aser Tuensang CMO Dr. Imli Ozüküm-i bendanga agüja nübür ajangzüksü asoshi inyakba atema pelaba lemsateper. Ano CMO, Mokochung aser Medical Superintendent, IMDH dang teyariteper tajung yokba asoshia pelaba lemsaer. Rongsen agi malizüktetba nenok teyariteper ajanga sentong kanga takok ngugo, Tsüngremi nenok taküm aser wadang tali moajangma.

Iba den külemi, Arogotem shirnokisa timtem agia nungdaka alirtem anir aruogo temaba nungi nenok wadang aser taküm moajangma.

Mapang kobi meli teyari osettsüset nungdakbapur nem agütsüba sentong asoshi sarasadema atar.

ANO GO ABEN TSÜNGREM DEN

TEMENEN MAPATEM MEMIIMPANGTETTSÜ

"Temenen inyakterem atsüktettsüsa; Tammang mesüra ayatrem maka." ~Yob 34:22

Ashikülak mapa inyaksü asoshi ayatrem amangji tajungtiba kechiyong iba mapang ya meimchir ajak sümanga mejangba mapang. Iba mapang nung shisatsü tamajungeri tasa aika abiteta mapa tamajung aika inyaktetsü akok saka item tamajung mapatem kenü anogo jungkai adoktsü kechiyong Tsüngremi ajak meteta lir.

Asenok meimcher shisatsüi atongba kaji nisüngi mungui amang nung inyakbaji shingai mangur aser memeteter saka asen teyanglur Tsüngrem shiba asen tenüki munguaka asen den teti lir Pai ajak ngua meteta lir.

Mapang aben asenoki bilemer tangar majung jembiba aser tangar raksatsütsü shisatsü nung sang tamajung yutsübaji shingai memetet, kechiyong asenoki jembiba dang aser yutsüdang shingai mangu aser mangashi saka asenoki ya mamatokli. "Kibuba tenükji tajunger aser tamajunger madak ajaklen mita lir. "Apijemtsü 15:3

Temenen mapatem nungi pilaa aliba amangbapur ka ka äsütsü merangdi.

UP nung Khristantem tekülem sentong tagidak mapang timtem agütsü

February 20, 2025: Tawa Uttar Pradesh state yimtiba, Lucknow kübok Gomti Nagar Extension nung Khristantem tekülem sentong tagidak mapang nung Hindu nungertem timtem agütsü, ajisüaka police mapang shidak nung aruba agi Khristantemji kümzük.

Bharwara State kiyong nung Khristan 30-40 shi adenshia tekülem sentong agibaji anema Hindu nungter telok kati longkak aita liasü. Iba sentong nungji tangartem Khristan yimsü dangi meiyidaksür, ta parnok Khristantem nem tai tonglokja liasü.

Arogo nung züngsem Morris Kumar-i, Khristantemji sarasademtsü atema adenshibba dang liasü, ta metetdaksü.

Kumar-isa, longkak aiterem jagi surveillance cameras raksatsü aser Khristantem amokmeren, ta metetdaksü.

Iba tensa aziöktsü atema Additional Deputy Commissioner of Police (East) Pankaj Kumar Singh aser ACP Vibhuti Khand Radha Raman nati police station ana nungi police team ana yoka liasü aser ibaji ajanga dang tensa süngjema liasü.

Osangbener den jembidang iba tesem nungji alir, Ritesh Mishra-i, tesüiba küm aika

Khristantemji ozüing alema iba kidangji tekülem sentong agia arur; Amongnü anepdang shia 10:00 ako nungi nikongdang 3:00 ako tashi Khristan 150-200 shi adenshia tekülem sentong agir, ta metetdaksü.

Ano külen BJP nung inyaker aser advocate BK Ojha-i iba kiojenji shibangjang aser aibelenertem anema inyakang, ta takhangba agütsü.

Additional Deputy Commissioner of Police-i, asüngdangyatsü atema Khristan kar soita ayu, saka tesülen parnok ajak chiokogo, ta metetdaksü.

Longkak aiterem aser Khristantem napronglai ken o benokogo aser police-i iba tatalokba bushisüngdang tenzükogo.

Uttar Pradesh nung anti-conversion ozüing tesashi benokba sülen 2020 küm nungi tenzuka iba ozüing kübok Khristan 398 densema nisung 855 puogo.

Anti conversion ozüing tasenba kübok aibelenertem nem bail magütsütsü aser taküm piyong tepuokdak ayusüa akok. Senchi lakh 5 tashi achitsü akok.

Yaküm August nungi September ita tsüngda kija nunga UP nung anti conversion ozüing kübok pastor 30 dak tali puogo.

Ohio state nung kaketshir 2,000-i Khrista nem bendanga agütsü



Ohio State University nung 'Unite US' sentong nung tangokba noksa nung angur.

February 20, 2025: Mongolbar aonung (February 18, 2025) Ohio State University campus nung kaketshir meyirjang aika adenshia Unite US sentong nung aden aser kaketshir 2000-i Khrista nem taküm bendanga agütsü.

Mongolbar aonung kanga temekong liasü, ajisüaka lanurtem aikati U-Haul trucks nung bapti.

Unite US-i social media ajanga, "Tesüiba küm ka tsüngda University campus tem nung Tsüngremi mapa tulu inyakba ajanga onok knga süngmanger, aser taonunga yangi Pai onok ajuruogo. Yisu Khrista tenüng

ajungkettsütsü atema kaketshir 6,500 dak tali The Schott nung adenshia liasü aser kaketshir 2,000-i sabangleni oa Khrista nem taküm bendanga agütsüogo," ta metetdaksü.

"Tan putu lanurtem madak Tsüngremi mapa inyaker, aser tang ya tetenzüker dang, ta onoki meteta lir," ta parnokisa metetdaksü.

Unite US tenzüksang Tonya Prewett-ia Instagram post ka ajanga, "Taonung Ohio State University nung atalokba ya tesüngmangtsüka liasü. Kaketshir 2,000 jungnüai Yisu den jajatsü telemtetba agi.

College campus tem nung Tsüngremi mapa inyakba ngua ni süngmanger," ta metetdaksü.

Taoba hopta University of Kentucky nunga Unite US sentong nung kaketshir 2,000 dak temai Yisu Khrista anem taküm bendanga agütsü aser parnok aika baptia liasü.

Taruba Unite US sentongji March 5 nü Indiana nung aliba Purdue University nung agitsü. 2023 küm September ita nung Unite US sentong tenzükba sülen college/University campus balala nung Unite US sentongtem nung tang tashi nung kaketshir 70,000 dak tali denogo.



Yangpi yimdak tamang yimsü arur küm 75 ajungba tamaitü Yangpi Baptist Arogo tenla kima platinum jubilee nungshilung ka CBLT Executive Secretary, Rev. Achu Chang-i meshiteta sarasademer lapoktsüba mapang tangokba noksa nung angur. Iba sentong ya Feb 18 & 19, 2025 anogo ananü Kin rongnung pa sentsüwangshi (T. Ken 96:3) omen dak amendaker takok ngua mungogo. Jubilee nungtem nungsa mezüing arogo tenzükertem nem tetushi agüja "El Bethel" ta sür ki ka Yangpi nung mezüing pastor, S. Nuken Longkumer-i sarasadema lapoktsü.

AO OSHI ANGAZÜKDAK:**TANÜ ANGAZÜKTSÜBA OJANG****Tejepra**

(v) talila anüka kümdaktsüba (soft and watery)

* Nisung aikati chi tejepra mechiyongner.

Tejok

(n) tzü endoker anüngba (separated solid matter from liquid)

* Süngo maka dangbo tejok moluzüka ajemer.



Tir Yimyim

OLONG PAITEP # 7070

1				2				3		4
5		6								
							7			
8										
										9
		10				11				
				12				13		
14										
						15				
16										

TIPLÉN

2. Auonungchiyongsüasenba
5. Mangyimba mapang
7. O tamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

1. Lenmang
2. Aor kidong ka tenüing
3. Tenarong maten
4. A _ _ _ g
6. Mopung apodoka
9. Tongtipang tagitsü
10. Menungra bilem
11. Aiür
13. S _ _ _ k
14. T _ _ _ r

OLONG PAITEP # 7069 TELANGZÜBA**TIPLÉN :**

1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret,
17. Sang.

LANGTSÜNGLEN :

1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.

NAI-A YA METETTER MA**TANG TASHI NUNG ICC CHAMPIONS TROPHY KOKER ALIBA LINÜKTEM**

Year	Host Nation(s)	Winner(s)
1998	Bangladesh	South Africa
2000	Kenya	New Zealand
2002	Sri Lanka	India & Sri Lanka
2004	England	West Indies
2006	India	Australia
2009	South Africa	Australia
2013	England and Wales	India
2017	England and Wales	Pakistan



Tanur asoba anogo nung salem osang den noksa angati adokdaktsünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Manipur nung prangbong injang aser bomb aika ngutetogo

Imphal, Tsüklai/February 20 (Agencies): Central aser state forces tem senteper taoba ghonda 24 tsüngda Manipur kübok Indo-Myanmar aartsü nung yimtsüng ka meita aoba mapang telungpurtemi toktsür aliba tesepe ka ngutet, kong prangbong injang, bomb aser tanga hadirtem nguteta liasü.

Ketdangsürtemi Brehostibarnü ashiba agi, telungpurtemi toktsür aliba tesepe ka nung prangbong injang yua aliba indang osang tejangja ka angazükba sülen Assam Rifles-i anir team kati iba tesem meketbanger meita aoba sentong ka ayongzüka liasü.

Tegnoupal District nung Machi Police kübok SL Zougam tesem nung meita aoba sentong ya ghonda ana shi benoka inyakba sülen sepaitemi prangbong injang aika nguteta liasü.


Sepaitemi ngutetba prangbong injangtem rongnung Improvised Mortar asem, Musket Rifles ana, magazine tyeraksa ka, Spotter scope ka, Binoculars ana, Monocular sight ka, Helmet ka, Bullet vests (bulletproof plate medeni) pongu, aser Rifle slings ana densema lir.

Ketdangsürtemi ashiba agi, prangbong injangtem ya Manipur Police nem bendanga agütsüogo aser parnoki maneni jenjang tapet agütsü.

Kasa mapang nung security forces temisa Tegnoupal district kübok Maojang yimtsüng nung Kenbo bike ka aser Chinese Hand Grenades ana ngutetogo

China nung yangluba Kenbo bikes ya Manipur nung amshitsü memelar. Iba bike ya arrtsü aden shiblentsü asoshi amshir aser kidang linük Myanmar nung kanga nüngtugu lir.

Maneni sepaitemisa Maojang yimtsüng nung AK 56 Rifle ka, 9mm pistols ana den magazine, 40 mm Lathode gun ka, Grenade ana, Handsets pongu den charger 3, Headphone pezü aser sling ana nguteta liasü.

PELABA LEMSATEPER**MATSÜNGSHIBA LONGKUMER****26.04.1982 – 16.02. 2025.**

Onoki teti meima aliba kinungbo aser jabaso **Wb.Matsüngshiba Longkumer** (Changtongya) ajungbena iba lima toktsür aoba mapang ozü asüku nung lemsatepsü asoshi shirnokisa aria bilema rongsen, nübo, shisatsü aser sarasadem agi ozü mulung zürep süngzükdaktsüogo, nenok ajak dang onoki kangasa pelaba metetdaktsür.

Talisa tembartem, kiyonger, Ao Arogo Unity Village, Ao Union Unity Village aser Changtongya Senso Telongjem Dimapur dang pelaba lemsateper. Onoki kija kibong aser lokti ajak tenüngteta yangi meshisemtetba atema kanga sasar, ajisüaka Tsüngrem taochi aser Yisu Khrista temeim agi nenok ajak moajangma ta onoki sarasademtsür.

~ Temeim Kinungsü, Tsürabur, Adianu aser Kinungertem.

Assam: Congress MP Rakibul Hussain amak

Guwahati, Tsüklai/February 20 (Agencies): Congress MP Rakibul Hussain Brehostibarnü Gunabari nung party worker tem senden ka nung adeni oya aliba mapang Assam nung Nagaon district kübok Rupahihat tesem nung pei tejak nembanger aliba telok kati amak.

Tenük kuli agütsürtemi ashiba agi, Rupahihat kübok Natun Bazar nung sü tanak agi pei tejak nembanger aliba nisung telok kati wako tanak ayiplokja Hussain indang convoy sot aser amak tenzüka liasü.

Item nisungtem yagi MP indang bodyguard dena amak aser iba ajanga security personnel temi lokti senshidaktsütsü aser Hussain kümzüka toktsütsü atema anüing nung injang khatoka liasü. Lendong nung nisung kanga mejungi yiruba osangbo kecha mali.

Local police-i iba tatalokba indang jangjatsüogo aser ashiba agi iba ajanga iba tesem nung tensa mejungi kümdaktsüogo. Police temi iba tesem nüka lir aser MP indang convoy amakertem jangjatsü atema bushisüngdang tenzüko.

"Tensa aziüoka lir aser iba amala inyakyim takaratiba nung puteta bentettsü atema onok bendanga agütsür lir," ta police ketdangsür tejen kati ashi.

Iba lendong nung Dhubri MP Hussain meyiru. Pai parnok amakba aitsüogo aser ashiba agi, iba ya democratic inyakyim amokmerentsü merangba ka lir. Paisa, parnok pusemertem dang süngjema alitsü mepeshia metetdaktsüogo.

Kasa mapang nung Congress party-i iba ken o kanga junga bushisüngdangtsü takhangba ka agütsüogo.

Mizoram Angh-i tesempba mozü shibelenba tebilemtsü lemsatep

Aizawl, Tsüklai/February 20 (Agencies): Mizoram Angh General Vijay Kumar Singh-i Bodhbarnü ashiba agi, state nung temesepba mozü shibelenba aser achiba tali akümba ya sorkar asoshi tebilemtsü tulu ka kümogo.

State assembly budget session lapokba mapang o jembidang Singh-i, state excise aser narcotics department aser tanga law enforcement agency temi temesepba mozü ajanga tebilemtsü bener arutsüba ya nokdangtsü asoshi takokba tashi inyakdar, ta ashi.

Paisa, inter-state arrtsü nung yimjung meraksadaktsüi temesepba mozü ajanga tebilemtsü bener arutsüba nokdangtsü asoshi kümküma alitsü, aser Myanmar o Bangladesh den state arrtsü nunga linük anema

inyaksangshibatem nokdangtsü atema meita atatsü nüngdakba lemastepa liasü.

"Tanü temesepba mozü shibelenba aser achiba tali küma odar aser iba ya sorkar asoshi tebilemtsü tulu lir," ta Singh-i ashi.

State police-i kanga junga meita ataba aser jenjang tapet agiba ajanga state nung taoba küm temzüing ozüing dak sendakba nung kecha tebilemtsü tulubo madok, ta Angh-i ashi.

Mizoram ya Assam, Tripura aser Manipur den arrtsü km 325 aser anütoklen Myanmar den arrtsü km 510 aser anüolen Bangladesh den arrtsü km 318 lemsateper. Singh-i ashiba agi, tang benoka aliba financial year nung temesepba mozü shibelenba 600 puogo aser temesepba mozü dak sendakba nung Narcotic Drugs and Psychotropic Substances

(NDPS) Act of 1985 kübok ken o 441 benokogo.

Temsepba mozü tapu balala seret 429.116 puogo aser bendanger temesepba mozü shibelenba 37 puogo, ta pai ashi.

Iba den bendenloksema Mizoram Liquor (Prohibition) Act, 2019 nung aibelter nisung 4,364 puogo aser liquor law kübok ken o 4,862 benokogo.

Ketdangsürtemi ashiba agi, Myanmar nungi Mizoram-i temesepba mozü aser talisa heroin shibelenba aruba ya 2021 küm kidanger linük nung military-i sorkar atsüngba sülen nungi tali kümogo.

Anogo 30 atema budget session Bodhbarnü tenzüker aser March 20 nü tembangtsü. Chief Minister Lalduhoma, shibai finance portfolio bona lir, pai March 4 nü state annual budget agütsütsü.

Hamasi Israel nunger nisung tasü mang pezü agütsüogo

Khan Younis, Tsüklai/February 20 (Agencies): Hamas-i 2023 küm October ita Israel amakdang apuba tetsür ka, lar tanur ana aser arishi küm 83 tain tebur ka tasü mang meyipa agütsüogo. Item tasü mang ya Brehostibarnü Gaza south tsütsü Khan Younis nung International Committee of the Red Cross (ICRC) nem agütsü. Nisung pezüi tasü mang inoka aliba süngden pezü ya melentepa sapang ka nungi Red Cross gari nung oa yutsü. Sapang tesülen poster tuluka nung Israel Ato Kilonser Benjamin Netanyahu tepang nungi tepu alua pa tejak nung azü yima alubaji Israel nunger tasü mang pezü agütsüba indang noksa nung jenoka noksa yua liasü. Hamas odongtar kati ashiba agi, par pezüprong takum liasü saka Zionist occupation aircraft ajanga asaa parnok aliba tesem nung bomb pokloktsü. Hamas-i sangdong ka nung, parnoki occupation prisoners takum kumzüka parnoki akokba agüja anepalua amshi saka par (Israel) army temi parnok pua alirtem den külemi tepset, ta ashi. "Mapa tamajung inyaker Netanyahu tanübo par prisoner tem tasü mang süngden nung inoker agütsüba mechi jepa yimjak nung parnok tepsetba tenü ng magitsü meranger," ta Hamas-i ashi. Israel nunger pua bener oa lia tepsetba kibongtem den jembidang, "Onoki ner tanurtem takum meyipa agütsütsü bilema liasü, saka ner army aser sorkar lenirtemi parnok tanaben anir arutsü melen tepsettsü ang shim," ta ashi. Brehostibarnü tasü mang meyipa magütsüdang sapang nung tasü mang süngden sentsü tanak pezü nung asürtem noksa tila-la inoker nüburtem dang sayua liasü. Süngden anasa mock missiles yuja liasü aser yangji "Parnok ya USA bombs agi tepset," ta shia liasü. Tasü mang meyipa agütsüba ya Hamas aser Israel tsü ngta ceasefire tezü ngzüktep nung shilem ka amai lir, kong Palestine nungera nisung noklang aika

Israel nunger tepuokdak nungi chioktsü, shirnok tait süba maka mesüra ken o mejembi nisung aika puoka lir. Israel-i Palestine nunger nisung 665 shi tasü mang yua lir aser yangji 1960s aser 1970s nung tepsetera aika lir ta Hamas-i ashir. ICRC nem agütsüba tasü mang ya Israel nunger kinü tanur Kifir Bibas, pa teti arishi küm pezü tain Ariel, tena tetsür Shiri Bibas aser pezü buba ya Oded Lifschitz alitsü. Israel nunger kaket zülur aser political analyst Akiva Eldar-i tasü mang meyipa agütsüba ya asenok ajak asoshi kangadang tejashitsü anogo lir ta ashi. "Item tanurtem ya Israel nunger tamachi, Israel sorkar sowar yimya aliba temaitsü lir," ta Eldar-i ashi. Israel nunger tepuokdak kanga mejungi aliba Netanyahu-i jungjunga meteta lir, ta pai ashi. "Saka pai danga nung temulung tali agütsü. Ibai kibong temi kinungertem tanaben kidangi shilangtsü imlaba aser Netanyahu-i akok tashi par sorkar lidaktsünüba aser mapang tali alizüka nüburtem takum dang nungi ali ya taoba ta angatetdaktsünüba tsü ngta asemtepba lir," ta Eldar-i ashi. Tasü mang agütsüba sülen süngden nung inoker army rabbi kati anir sentong tatsüka agitsü. Iba sülen

parnok ya Israel nung bener oa national forensic institute nung jangjatsü, aser iba inyakyim ya ghonda ishika mesüra anogo ishika agitsü akok. Parnok jangjatetba sülen ang parnok asüba sangdongtsü aser asüpila sentong agitsü. Brehostibarnü tasü mang pezü agütsüba sülen ano takum alir nisung trok Honibarnü agütsütsü aser iba melen Palestine nunger noklang dak tema tepuokdak nungi chioktsü, kong Gaza nung raraba mapang Israel sepaitemi apuba tetsür aser tanurtem alitsü imlar. Ceasefire tezü ngzüktep kübok Hamas-i pua alir nisung 33 chioktsü aser iba melen Palestine nunger tepuokdak alir nisung 2,000 jungnüa chioktsü pangjema lir. Tang tashinung Israel nunger nisung 19 aser Thai nunger pongu chiokogo. Ceasefire phase tanabuba ya anogo ishika tsü ngta tenzü ktsü imlar, aser iba mapang tanü ngba pua alir 60 shi chioktsü imlar, kong tesadang ka majung takum lir ta imlar. Kasa mapang Gaza Strip nungi Israel sepai ajunga ainshia rara tatem kati arutsü. Israel-i Gaza amakdang Palestine nunger 48,000 dak tema tepsetogo aser ano meyirijang aika bomb pokloktsüdang chirepba ki o jen agi anenbanga lir.

US-Russia diplomatic mission yanglushitsü mulungtepogo: Putin

Moscow, Tsüklai/February 20 (Agencies): Russia Tir Vladimir Putin-i tawa par linük aser US nungi teshimtet lenirtem senden amenba ya tembar tajung ama liasü aser US ya indang indanga jembishinütsü mulunga lir ta ashi. American delegation ya langpang nung amendang tesüiba mapang atalokba indang tait süba kecha meliasü aser külemi inyaktsü mulunga liasü, ta Putin-i ashi. Linük anaprongi 'bilateral diplomatic missions' yanglushitsü mulungogo, ta pai ashi aser teti dang tsüktepba ajanga tajung kecha majangzü ktsü ta shisem. Küm asemjungnüa Ukraine nung rara aruba tatem kati arutsü nükdakba asoshi Mongulbarnü Riyadh, Saudi Arabia nung Russia aser US ketdangsürtem senden amenba sülen Putin-i iba o ya ashi. "Senden kanga junga liasü. Asen lenirtemi küdang ashiba agi, America nunger tsütsü nisung ajak khenyongi balaka liasü aser parnoki indang indanga yimjung ken o jembishinütsü mulunga lir aser taoba mapang inyaksangshiba indang maitsür. Taoba mapang linük ana tsü ngta 'bilateral contacts' meliasü saka parnok renema lir aser külemi inyaktsü mulunga lir," ta Putin-i ashi. "Asen diplomatic agencies akhi yimya nung inyak tenzü ktsü mulungtepogo. Washington aser Moscow nungi tanen makai diplomats tem meindokba ajanga tajung

kecha masütsü. Yamai dang ora, item ki o jen nung mürekmejur dang anü ngtsü. Hao asenoki parnok mapa pela agizüktsüla, saka diplomatic agencies ya iba atemaji tenzü kba masü," ta pai ashi. Iba senden nung adener tejangja nisungtem rongnung US Secretary of State Marco Rubio aser Russian Foreign Minister Sergei Lavrov na dena liasü aser iba mapang lenir ana yagi rara tembangtsü aser parnok yimten tesendaktep aser rongsenketzü ng tesendaktep tajungba akumtsü asoshi mapa inyak tenzü ktsü mulungtep. Iba senden amenba sülen Washington-i sangdong ka nung, Russia aser US tsü ngta sensaksemba ajanga tarutsü nung amaliteptsü asoshi 'groundwork' tenzü kogo aser linük ana yagi iba senden ya tejakleni aotsü atema tongtipang mera ka ama zü ngshir, ta shia liasü. Akok tashi tekeratiba nung Ukraine nung rara tembangtsü asoshi inyakteptsü atema Rubio aser Lavrov nati pei sasep nung high-level team shimtsü mulungtepogo, ta State Department odongtar Tammy Bruce-i ashi. Taoba hopta US Tir Donald Trump-i phone ajanga Putin den jembiba sülen meputepi aliba linük ana tsü ngta senden amenba ajanga parnok tesendaktep melenshir. Bodhbarnü Putin-i Trump den ajurutepner ta ashi saka tajangzü k alitsüsa senden renemtsü nü ngdaker ta ashi.

South Korea tir Yoon Suk-yeon okadaki aru

Seoul, Tsüklai/February 20 (Agencies): December ita mapang tatsüka atema martial law benokdang yimden anema inyaktsü merang ta tai tonglokja aliba ken o angadangtsü asoshi South Korea tir Yoon Suk-yeon okadaki arua liasü. Brehostibarnü Seoul Central District Court nung iba ken o ya jembia liasü, kong pa bhukumer ishika adenshiba yong security akangshi aser kuli agütsütsüpur aser jelia renemshitsü indang onüktem jembi. Yoon apuba thiya tepuokdak nungi chioktsü atema par okatsür temi asü ngdangba court ajanga jembitsü. Hopta ka shi par kidang mangatettep adoka aruba sülen Yoon ya police temi January 15

nü apu, koba South Korea nung tir teinyakdak ka anema iba ama mera tang mezü ngbuba agia liasü. Yoon-i television ajanga December 3 nü martial law sangdong aser ibai North Korea indang communist tashi nungi South Korea kumzüka ayutsü aser 'antistate elements' samatsütsü asoshi lir ta shi. Yoon-i iba ozü ng sangdongba anemer meyirijang aika yimtung nung longkak ait tenzü k aser National Assembly nung ozü ng yanglurtemi iba ozü ng ya ghonda trok shi lir agienja liasü. Sorkar anema nokdakba ken o nung ketdangsür temi January 26 nü Yoon anema ken o benok aser pai ozü ng agütsüba ya National Assem-

bly shibanger yimten yimsüsür aser election ketdangsürtem aputsü merangba map aka liasü ta tai tongloktsü. South Korea nung tir ya criminal prosecution timba agi memerenshiteter, saka yimten

anema nokdakba mesüra ashikülak mapa inyakba nungbo tatok mali. Iba ken o nung aitsüra Yoon ya tasüba agi merenshitsü, mesüra takum piyong tepuokdak ayutsü.

BAPTIST HIGHER SECONDARY SCHOOL
MANGKOLEMBA

Teacher Vacancy For the Post of Tourism & Hospitality REQUIREMENTS:

- Master of Hotel Management and Catering Technology or Bachelor of Hotel Management, Travel & Tourism or Diploma in Hospitality & Tourism Management
- Experience in Food and Beverage Service/Classified Hotel/Facility Management Company preferred
- Basic communication skills (oral and written) with basic computing skills

Interested candidates can mail your resume to **bhss_mba@yahoo.co.on** or contact **7005946609/9148087270** on or before **7th March, 2025.**

Madrid, PSG, Dortmund round of 16-i iogo

CHAMPIONS LEAGUE

Tsüklai/February 20, 2025 (Agencies): Bodhbarnü Champions League asaya nung Kylian Mbappe-i hat-trick ka idaktsüba sülen Real Madrid-i goal 3-1 agi Manchester City kokogo. Iba asaya nung Erling Haaland temekok yiruba ajanga masayateti liasü.

Asaya akokba sülen Real Madrid-i 6-3 aggregate nung Manchester City kokogo.

Bodhbarnü Borussia Dortmund aser Sporting Lisbon na asaya goal kaka danga magütsüi tembang, ajisüaka taoba leg nung Dortmund-i goal 3-0 agi asaya koker aliba ajanga parnok taruba round-i iogo.

Tanga asaya ka nung Paris Saint-Germain-i 7-0 agi Brest koka parnoki 10-0 aggregate nung takok ngua round of 16 tongtetogo, kong parnok Liverpool mesüra Barcelona den asayatsü.

PSV Eindhoven-ia 4-3 aggregate agi Juventus tsükdaktsüogo.

Madrid aser City na asaya nung Mbappe-i tetenzük nungi kanga junga asaya aser



Manchester City den asayaba mapang Kylian Mbappe-i hat-trick ka idakja Madrid-i asaya goal 3-0 agi kokogo.

pai minute 4buba nung mezügbuba goal idaktsü. Iba sülen paisa, minute 33buba nung tanabuba goal aser minute 61buba nung tasembuba goal idakja par team nem takok agüja liasü.

PSG aser Brest na asaya nung winger Bradley Barcola aser Khvicha Kvaratskhelia nati asaya mezügbuba shilem nung goal kaka idaktsü aser asaya tanabuba shilem nung midfielder Vitorinha, Desiré Doué, left back Nuno Mendes, striker Ramos aser Senny Mayulu nungeria goal kaka idakja liasü.

Real Madrid, PSG,

Dortmund aser PSV den taoba mapang qualify sür aliba Bayern Munich, Benfica, Club Brugge aser Feyenoord nung Hokolbar round of 16 asayatsü. Iba playoff akokba team tem March 4 aser 5 nü mezügbuba leg asayatsü.

Hopta asem tejakdang asayaba mapang temaba jenjang nung tembangba team ti playoffs ajanger round of 16-i iogo. Team tem rongnung Liverpool, Barcelona, Arsenal, Inter Milan, Atletico Madrid, Bayer Leverkusen, Lille aser Aston Villa densema lir.

Venus nem Indian Wells atema wild-card agütsü

Tsüklai/February 20, 2025 (Agencies): Grand Slam kija asaya tenet koker alila Venus Williams nem Indian Wells, California nung taruba BNP Paribas Open atema wild-card entry ka agütsüogo.

Iba asayamung ya taruba ita asayatsü. Williams küm ka shi masayai lir iba asayamung nungi asayashi tenzüksü.

Arishi küm 44 tain asayar ya tatemsa 2024 küm March ita Miami Open nung asaya, kong la mezügbuba round nung tsüka liasü. La Indian Wells nunga tatemsabuba asayaba mapang mezügbuba round nung tsüka liasü.

Williams ya Indian Wells nung 1994 küm nungi asayar. Lai Wimbledon nung kija asaya pongu aser US Open kija asaya ana koker lir aser iba den tenu Serena den Grand Slam tarep asaya 14 koker lir.

Venus Williams den külemi asayamung ayongertemi wild-card

agütsürtem rongnung, Wimbledon anaben tashi koker alila Petra Kvitova densema lir, shiba tanur soa bentsüba ajanga ita 15 masayai lir tang asaya tenzüksü lir.

Kasa mapang nung lanur asayartem rongnungi sempet tajung aketba asayar João Fonseca aser Learner Tien na nema wild-card agütsüogo.

Arishi küm 18 tain Fonseca-i tawa Argentina Open nung pa atema mezügbuba ATP title ka benogo aser arishi küm 19 tain Tien, January ita Australia Open nung round pezübuba tonga asaya liasü.

BNP Paribas Open ya tennis asayamungtem rongnung tongtibang asayamung ka lir, koba March 2 nungi 16 tashi asayatsü. Iba asayamung ajanga item asayartem nem parnok sempet sayutsü aser temaba jenjang nung aliba asayartem den tokteptsü atema maongka agütsür.

Pakistan team nung Fakhar Zaman melena Imam shimogo

Tsüklai/February 20, 2025 (Agencies): Pakistan indang Champions Trophy squad nung Fakhar Zaman melena Imam-ul-Haq shimba ICC-i agizükogo. Fakhar yiruba ajanga masayatetsüsa kümogo.

New Zealand den Karachi nung mezügbuba asaya asayaba mapang fielding amendang yiruba sülen Fakhar ground toktsür aotsüsa aküm.

Mezüngbo PCB-i, Fakhar tetsü yiruba atema temang asadangdar ta ashi. Ajisüaka pa batting amenba mapang over terbuba nung pai junga masayateti timtemba nguogo aser pai ball 41 nung run 24 yanglua liasü.

Brehostibarnü ICC-i, Fakhar yiruba ajanga asayamung nung shilem magitetsüsa akümba officially sangdonga liasü. Squad nung asayar melentsü atema Event Technical Committee nungi jelia temelaba agitsü nungdaker.

ICC Men's Champions Trophy 2025 Event Technical Committee nung Wasim Khan (ICC General Manager - Cricket), Sarah Edgar (ICC Senior Manager - Events), Usman Wahla (PCB Director - International Cricket Operations), aser Shaun Pollock (Independent Representative) nung densema lir.

Arishi küm 29 tain Imam-ul-Haq shiba ODI 72 nung asayaago, pai Fakhar melenogo. Fakhar ya-a Saim Ayub melena shimba asayar ka liasü, shiba tetsüng teloktep yiruba ajanga masayatetsüsa aküm.

February 23 nü Dubai nung India den asayatsü atema opening pair ka shimtsü asoshi Pakistan team renemba mapang Imam 2023 küm sülen tang mezügbuba international cricket asayatsü lir. Mezügbuba asaya nung New Zealand run 60 agi makokba sülen Pakistan team-i India akoktsü nungdaka kümogo.

Mon Inter Departmental asayamung tembangogo



Dimapur, Tsüklai/February 20 (TYO): 11buba Inter Departmental Tournament Mon, February 19 nü Officers' Club Mon (OCM) nung tembangogo. Asayamung shibangba sentong nung Konyak Union tir Tingtok Konyak alakteta jaoker liasü.

Sentong nung o jembiba mapang KU tir-i, iba amala asayamung tajung ayonzükba atema Officers' Club Mon dang kanga pelaba lemsatep. Paisa, iba asayamung ajanga Mon nung aliba nüburtem aika ajungmesor aser iba ajanga asayaba balala aser talisa Badminton asaya nung

asayartem renloka odaktsür ta ashiba den pai Leihong Konyak shibai tawa Indo Nepal International Badminton Championship nung kija aser tarep asaya naprongla nung gold medal ngua liasü, iba indang tatishitsü bener arua jembia liasü.

Paisa, iba amala asayamung ayongzükba ya temang anema alitsü atema kanga tajung, aser iba ajanga district nung mapa ata aliba ketdangsürtem kati ka tali tajungba angatetsü asoshi maongka tajung agütsür ta ashi. Tingtok-i, iba asayamung ayongzüka asayaba ya Konyak nung

lokti tentet balalai kanga pelashishia agizüker aser tarutsü nung takokba tashi nongita yaritsü, ta ashi.

Asayamung mapang DC Team aser SP Team na tsüngda badminton exhibition match asaya liasü.

Asayamung nung Department of Health & Family Welfare Team Champion aser DEO runners up liasü.

Asayamung shibangba sentong nung Addl. SP & OCM Co Convenor Ado Yanlem-i lokti pela agizükba o jembia aser SDO (Civil) Mon Ajit Kumar-i tepela o jembia liasü.

BILEMDANGANG

"Timla samara ajak samatsü."